

欽定大清會典事例

欽定大清會典事例卷一百七十三

戶部

田賦

催科考成

帶徵接徵官考成

催科考成。順治七年題准。督徵錢糧。知府直隸州知州。以所轄各屬之完欠計分數。布政使司。以通省之完欠計分數。十八年覆准。錢糧議處官員。於未離任前催徵全完。准予開復。至後任官代徵完者。不准。○康熙二年覆准。除漕糧。白糧。各倉米穀鹽課。蘆課顏料等項。不併入徵催地丁錢糧考成外。其各部寺一應起解賦

銀總作十分考成。○又題准徵收錢糧。本年內全完者。紀錄一次。三年相接均全完者。加一級。○又題准地丁錢糧。經徵之州縣官。未完不及一分。停升。罰俸一年。一分降職一級。二分至四分。遞降至四級。並戴罪催徵。五分以上革職。督催之布政使司。道府。直隸州。未完不及一分。停升。罰俸半年。一分罰俸一年。二分降職一級。三分至五分。遞降至四級。並戴罪督催。六分以上革職。巡撫未完不及一分。停升。罰俸三月。一分罰俸一年。二分降俸一級。三分降職一級。四分

至六分遞降至四級並戴罪督催七分以上革職○又議准衛所錢糧亦作十分考成經徵照州縣督催照司府例議處○又題准州縣官叅後戴罪催徵之地丁錢糧限一年全完不復作分數限內不完原叅不及一分降職一級一分降三級二分降四級三分降五級皆調用四分以上革職○四年題准經徵督催文武各官除一年內二三員接徵全完並署任不久者不議敘外凡起運錢糧一年內全完者經徵之州縣官五萬兩下五萬兩上至十萬兩上督催之道

府直隸州十萬兩上至二十萬兩上。均自紀錄一次。遞加至紀錄三次。巡撫布政使司五十萬兩下。紀錄一次。五十萬兩上至百萬兩下。紀錄二次。百萬兩上。加職一級。經徵之千總守備千兩下上。至三千兩上。議敘視州縣督催之都司五千兩下上。至萬兩上。議敘視知府。○又題准凡錢糧未完各官如遇

恩赦該撫確查

赦前月日扣除以

赦後月日起算限年催完至限滿續叅時註明

赦前

赦後分數具題。如年限內原叅

赦前未完分數全完。止照

赦後未完分數議處。若年限內原叅

赦前未完分數。尚未全完。仍合

赦前

赦後分數。一併議處。如原叅分數。均在

赦前年限內未經全完者。仍照初叅分數。以初次例

議處。○又議准。各官止完地丁錢糧。而本色顏

料及起運雜項未完者。不准議敘。或將未完錢

糧捏報全完。或一年內二三官接徵全完。捏報一人徵完者。州縣衛所官革職。司道府都司降職二級。巡撫降職一級。皆調用。如州縣等官申報未完。司道府都司以完申報者。司道府都司革職。州縣等官免議。如司道府都司申報未完。巡撫以完題報者。巡撫革職。司道府等官免議。○又題准直隸知州督催屬縣錢糧。叅後未完。照一年半例議處。經徵本州錢糧。叅後未完。仍照一年例議處。○又題准限滿未完各官。限內又遇

恩赦者。扣除

赦前月日。止以

赦後計算年限查叅。○又題准。有司叅後續完錢糧者。該管官一面給批收。一面申報督撫。題請開復。○又題准。有司叅後續完錢糧。題請開復。如該管官遲延不報。藉端駁詰留難者。聽督撫指叅。督撫不即具題者。一併議處。○又議准。叅後戴罪催徵之地丁錢糧。州縣官年限內不全完者。原叅未完不及一分。降職一級留任。再限一年。戴罪催徵。仍不全完。照原降之級調用。原叅

未完一分以上。能催完至八九釐者。降職三級。留任。再限一年。戴罪催徵。仍不全完。照原降之級調用。原參未完二分降四級。三分降五級。皆調用。四分以上革職。○九年覆准。州縣經徵錢糧。督撫查其有無敲扑過嚴。以致百姓流亡。歲終於奏銷冊內。註明有無累民字樣。取具不扶同甘結報部。方准議敘。○十年題准。催徵錢糧大小各官。或因事故離任。按其所欠分數應虛降虛革者。皆照離任官例。罰俸一年。至革職者。仍行革職。○十二年覆准。參後戴罪督催之地。

丁錢糧巡撫限二年。布政使司道府直隸州限
一年有半。原叅不及一分者。初限不完。降職一
級。二限不完。降職二級。仍戴罪督催。三限不完。
降三級調用。原叅一分以上者。俱照州縣例議
處。督催之都司限一年有半。衛所官限一年。原
叅不及一分者。初限不完。停升。罰俸一年。二限
不完。降職一級。仍戴罪督催。三限不完。調用。○
又題准。凡已叅未經離任之官。於接任並署印
官未到之先。將拖欠在民錢糧催徵全完者。仍
准開復。○十五年議准。不作分數雜項錢糧如

數明未完者。降職二級。戴罪催徵完日。開復如
年限內不完者。罰俸一年。仍令催徵。○又題准。
有司叅後續完錢糧。該管官不為詳報。或將不
應開復者。申請開復。皆罰俸一年。巡撫罰俸六
月。或重報開復。及遺漏續完各官職名者。亦罰
俸六月。○二十三年題准。直隸順天等府。撥給
旗下地畝。將別州縣衛所額外開墾官屯等地
補還。其應輸糧課考成。歸受補州縣徵比之事。
歸受撥州縣。○二十六年題准。存留支贍銀有
未完者。照雜項錢糧例處分。裁扣充餉銀。歸併

起運內總作分數考成。○三十年議准撥補地租代徵官亦作十分考成。照催徵錢糧例酌量減輕。經徵之州縣衛所未完不及一分。停升。一分罰俸三月。二分罰俸六月。三分罰俸一年。四分降俸一級。五分降俸二級。六分降職一級。七分降職二級。八分降職三級。九分降職四級。皆停升。戴罪催徵完日開復。至十分者革職。督催之布政使司道府直隸州未完不及一分。免議。一分罰俸兩月。二分至十分。照經徵官一分至九分議處。巡撫未完不及一分。免議。一分。二分。

皆罰俸兩月。三分至九分以上。照經徵官一分至七分議處。皆停升。戴罪督催。完日開復。署印官在任不及一年者。未完不及一分。免議。一分二分罰俸兩月。三分四分罰俸三月。五分六分罰俸六月。七分八分罰俸九月。九分罰俸一年。十分降一級調用。署印不及一月。亦免議。參後催徵限一年全完。限內不完。原參不及一分。罰俸九月。一分二分降職二級。三分四分降三級。五分六分降四級。七分八分降五級。皆調用。九分十分革職。督催之巡撫限二年。司道府直隸

州限一年有半。限內不完不及一分。罰俸六月。
一分二分降職一級。三分四分降二級。五分六
分降三級。七分八分降四級。九分十分降五級。
皆留任。接徵接催官。以到任日為始。亦限一年
全完。限內不完。照初叅例處分。其代徵租銀。關
移本處給發。如給發不實。照監守自盜例治罪。
受撥之州縣衛所。不移催代徵官。及不將未完
分數申報上官者。歸入正項錢糧處分內議處。
已移催申報免議。○四十三年覆准。嗣後未完
降住罰俸等項銀。報叅原欠之現任各官。上司

均免叅處。報叅原欠之現任府同知。州同。縣丞。以下佐貳雜職等官。府州縣免其叅處。如有離任官未完者。即以接任承追之官報叅。學租一項。州縣未完。止叅承追州縣。毋庸開報。督催之知府。惟江南江甯常州揚州三府儒學徵收學租。向例奏銷冊內。造於知府項下。今知府既無督催考成。嗣後三府學租。於奏銷冊內。別行開造。如有未完。將儒學教官開報。至官生空缺一項。亦照此例遵行。○四十五年題准。蘇松常鎮四府屬。經徵錢糧。限滿未完革職官。令其革職。

留任。○四十六年覆准江蘇賦繁州縣錢糧三載全完。內雖有奉蠲之年。仍准即升。○雍正二年

諭。貴州通省地丁錢糧。不足十萬兩。若照成例。止有經徵各官得邀議敘。督催各官。雖極效力。終不得與。今或照十萬兩以下。一年內全完之例議敘。或俟二三年督催全完。再行議敘。戶部會同吏部定議具奏。欽此。遵

旨議定。嗣後黔省知府直隸州知州督催應徵錢糧。歲內全完者。照十萬兩以下之例議敘。○五年題

准浙省額徵南秋等米除給本處兵餉外餘解
省倉支給滿漢官兵俸餉織造匠糧此項因係
冬徵彙入奏銷案內揭叅徵解遲延止於罰俸
累累拖欠應別疏題銷將已完未完數目報部
經徵州縣官未完不及一分免議一分罰俸六
月二分住俸三分降職二級四分三級五分六
分以上革職皆令戴罪催徵完日開復叅後逾
限不完者倍處如應罰俸六月者住俸應住俸
者降職二級應降職二級者降四級應降職三
級者革職戴罪催徵完日開復應革職戴罪者

實降二級調用。署印官照署徐淮等倉錢糧未完事務處分。督催之巡撫藩司等官。未完不及一分。免議。一分罰俸三月。二分罰俸六月。三分住俸。四分降職二級。五分三級。六分以上革職。皆令戴罪督催。完日開復。叅後違限不完者。倍處。應罰俸三月者。罰俸六月。應罰俸六月者。住俸。應住俸者。降職二級。應降職二級者。降四級。應降職三級者。革職。戴罪督催。完日開復。應革職戴罪者。實降二級調用。至州縣徵收南秋等米。一年限內。全完一千石以上。至五千石。照地

丁五萬兩以下之例。紀錄一次。五千石以上。至萬石。照五萬兩以上。十萬兩以下之例。紀錄二次。萬石以上。照十萬兩以上之例。紀錄三次。督催知府直隸州糧道。一年限內全完萬石以下。紀錄一次。萬石以上。紀錄二次。二萬石以上。紀錄三次。布政使司。照地丁議敘之例。議敘。○七年議准。州縣經徵錢糧。歲內全完。原有議敘之例。恐有司希圖紀錄過於急迫。又或以尾欠未清。捏稱完足。嗣後將歲內全完議敘之例。概行停止。其奏銷以前。果能通完。概予議敘。○乾隆

十二年議准本年奏銷未完各官照例隨本題
叅戶部會吏兵二部議處題覆如部覆奉

旨之後該省已接准部文續報叅後徵完者由督撫
將議處之案題請開復若部覆已經奉

旨尚未行文該省咨到叅後全完者由部據咨題請
開復其有未經題覆該省咨到叅後全完者即
於本案奏銷內扣除免議○十三年覆准錢糧
未完案內各官續報全完如係別案革職以及
佐雜微員毋庸概行具題止用咨文到部覈明
轉咨吏部辦理○十五年覆准江南江蘇所屬

乾隆元年起至九年。軍民舊欠地丁驛站河工等銀。除淮徐等屬。乾隆六年以前永行停緩外。如各州縣衛欠數在萬兩以內者。限一年徵完。萬兩以上。至三萬兩以內者。均作二年。三萬兩以上。至五萬兩以內者。均作三年。五萬兩以上。至十萬兩者。均作四年。十萬兩以上者。均作五年徵完。州縣官初限不完者。降職二級。仍同次限分數併徵。如二限已滿。止完足上限之數者。仍帶原降之級。留任一年。再同下限分數併徵。以後按年應徵分數。總以完足上限之數止。欠

本限分數者。照此例議處。如上限本限均有未完。即照所降之級調用。其接徵之員。概以接徵之日。另起初限。亦照此例議處。各衛漕項未完處分。照文職例察議。○三十一年奉

旨。金山靖江二縣錢糧。為數雖不及五萬兩。但經徵三載全完。催科亦屬非易。著加恩准其一體議敘。○三十五年奏准。經徵錢糧定例。五萬兩以上全完。紀錄二次。五萬兩以下全完。紀錄一次。至簡僻地方。經徵錢糧。有不及百兩。並止二三十兩者。應仿照河工催徵河銀之例。催徵地丁銀兩。於

奏銷以前全數通完。在三百兩以上者。紀錄一次。未及三百兩者。概毋庸議。敘如未全完。仍照例議處。○又奏准江蘇賦繁州縣。如該年錢糧於奏銷時未完。曾經議處者。即續據徵完。不得入於三載全完之內。合計議敘。其有奉蠲之年。即將是年扣除。俟次年補足併計。再請議敘。○四十七年議准直隸省旗地租銀。經徵各員。除初參未完。仍照舊例辦理外。其二參三參未完。並經徵接徽州縣。及督催各上司。均分別予以展參處分。如經徽州縣官。初參不及一分罰俸。

一年者。二參降職一級。再限一年。如又不完。降職二級。戴罪催徵。初參欠一分。降職一級者。二參降職二級。再限一年。如又不完。降二級調用。其初參欠二分。三分。四分。降職二級。三級。四級。限滿不完。降職三級。四級。五級。再限一年。如仍不完。即照所降之級調用。督催之院司道府廳州。初參不及一分。罰俸半年者。二參罰俸一年。三參降俸二級。初參欠一分。罰俸一年者。二參降俸二級。三參降職二級。初參欠二分。三分。四分。降職一級。二級。三級者。二參。三參均分別分。

數以次遞加。至接徵州縣及接任督催之各上司如於二叅二叅限內到任。不計分數。限滿不完。州縣降職二級。院司道府廳州各降俸二級。俱停其升轉。戴罪催徵。徵收全完。准其開復。至遇災歉之年。仍照定例。分別蠲緩帶徵。限滿不完。均按未完分數一體查叅。每屆五年。該督將有無未完積欠。清查具奏。如有未完。即在於歷任經徵接徵州縣及督催各上司名下。按日攤賠。○四十八年議准。各州縣經徵耗羨。隨同正項報解。若有未完。經徵各員。照正項錢糧未完。

之例議處。○四十九年覆准各省額徵各款耗銀。分別經徵接徵。及院司府州督催各職名覈計已完未完分數考成。隨同地丁奏銷。○五十二年奏准額徵本折南糧。應於年內催徵全完者。至次年奏銷時。如有未完。將經徵之員題叅勒限三月。依限全完。准其開復。限滿無完。照地丁錢糧一年限滿之例。按照未完分數議處。○又覆准安徽額徵本折南屯米麥豆石。以及屯畝貢舫等項銀兩。應將完欠奏冊添立分數。派作十分計考。於五月奏銷時。專案題報。如有未

完。卽照經徵南糧之例。立限催追。分別議處。○
又覆准江蘇各州縣成熟田地。應徵南兵米豆。
按照額數。亦派作十分計算考成。儻至奏銷時。
仍有未完。江甯於七月初一日起。江蘇於六月
初一日起。照例勒限三月催徵。逾限不完。分別
議處。○五十二年奏准。各省耗羨。已未完解數
目。卽隨同正項錢糧統計分數。合疏具題。以定
考成。如正耗全完。方准議敘。耗羨儻有短缺。卽
統計正耗分數。議處。其奏後。仍未完解者。歸於
正項年限案內報參。儻正耗完。欠報解不符者。

嚴叅查辦。○五十六年議准河東鹽課歸入地
丁款內攤徵。經徵州縣及督催之該管道府各
照攤徵定額。按年催徵通完。所有經徵各官如
按年徵解全完。照例議敘。儻催徵不力。致缺定
額。即令經徵各員照數賠完。並將督催各職名
送部議處。○嘉慶三年議准浙江杭州滿營牧
廠餘地以及塘外漲復新沙墾種地畝。應徵租
錢。該州縣於九月開徵。至次年四月底止。埽數
全完。於五月造冊題報。依限全完。給予議敘。如
有未完。將經徵之員開叅。照南米尾欠例勒限

催徵限內全完准其開復。逾限不完卽責令經徵之員照數賠繳。仍照地丁錢糧一年限滿不完之例分別議處。○五年議准。江西各衛屯田額徵租銀向例係由各州縣徵收徑解糧道。給丁濟運。惟糧道每年督運春出秋歸在外日久。無暇催徵。嗣後廣饒九南道吉南贛甯道所屬屯租改歸各巡道就近督催徵收。如有拖欠遲延等事。開列該管各巡道職名送部查議。○七年議准。直隸旗地租銀未完經徵督催各員二年處分。均照地丁錢糧例不復作分數。卽按原

欠分數分別予以降調革職。其接徵接催各員。亦照地丁錢糧例另行起限催徵。限滿不完。分別議處。每年經徵帶徵分數未經全完。如有官侵吏蝕等弊。該督隨時嚴叅另辦。其實係民欠。即覈明初叅二叅未完分數。造冊報部覈辦。○二十一年奏准各直省徵存上忙錢糧。除例准留支及實欠在民外。儘數提解司庫。仍照原定章程。將實徵實解細數。按限造冊。報部備查。毋庸予以處分。統俟下忙報解銀數之後。該督撫一面造冊咨部。一面查明各州縣錢糧如有已

徵未解者。即行據實嚴叅。儻該督撫不行叅奏。經部查出。即將該督撫一併叅處。至民欠未完錢糧。及州縣官經徵不力處分。仍照舊例於奏銷時覈計分數辦理。○二十二年

諭方受疇奏錢糧完解九分有餘。請免上忙經徵督催各員處分等語。直隸二十一年分上忙錢糧。三河等州縣未完銀十九萬三千餘兩。前降旨令方受疇將徵解不力各州縣及督催不力各道府直隸州職名咨部議處。嗣經議定章程。各直省上忙錢糧將徵解實數造冊報部。毋庸予以處分。統歸入下忙辦理。所

有直隸上年上忙未完錢糧徵解不力州縣及督催不力之道府廳州俱著免其議處其民欠未完錢糧州縣經徵不力處分統俟奏銷時覈計分數照例叅處○又議准甘肅省各屬應徵上色糧石不及分數經徵之員叅革嚴究所短糧石直隸州經徵者著落該管道獨賠其經徵之州縣由府轄者該管府分賠八成該管道分賠二成由直隸州轄者直隸州分賠八成該管道分賠二成其經徵上色糧石仍照舊辦理○道光三年

諭戶部奏請飭催各省節年未完雜稅銀兩分別開單

呈覽。朕詳加披閱。除盛京山西湖南浙江四川陝西貴州等省年清年款。甘肅雲南兩省未完銀兩。為數無多。由該部隨案咨催外。所有直隸山東河南江蘇安徽江西福建湖北廣東廣西等省。節年積欠銀兩。自道光元年奏催後。尚未完銀一百八十三萬四千一百二十二兩零。嘉慶二十五年並道光元年。復有未完銀四十八萬一千六百二十三兩零。各省雜稅銀兩。向係隨同地丁錢糧奏銷。自應儘收儘解。乃各該省歷年積欠。竟至數十萬兩之多。地方官恃無展。參處分。任意遲玩。延不報解。其中顯有虧挪情弊。著

各該督撫卽飭各藩司查照戶部單開未完銀數。勒限六箇月。嚴提解司報撥。毋任宕延。此項雜稅錢糧。向無未完處分。以致日久延玩。著該部覈議章程。通行各省。遵照辦理。欽此。遵

旨議定。直省不作分數雜稅銀兩。每遇奏銷屆限以前。該藩司將各屬報徵銀兩全數提解司庫。毋許積存。不准將當年欠解銀兩歸入下屆奏銷。牽混報銷。如欠解無幾。經徵官仍照例降俸二級。上司免議。其欠解最多州縣。責成該藩司。於奏銷時指名叅辦。戶部仍按各省奏銷報徵數目。

覈明欠解最多省分。將催提不力之該管上司。奏明叅處。○六年題准。各省起運地丁等項錢糧。經徵督催之文武各官。如奏銷前一年內係二三官接徵全完。並署任不久。或經徵錢糧無多。不及三百兩全完者。毋庸議敘。其三百兩以上。於奏銷前全完者。按銀數多寡。分別議敘。果能三載全完。無論錢糧多寡。於每年照例議敘之外。仍准再予加級。叅後續完。不准併算。若遇奉蠲之年。將是年扣除俟次年補足併計。題請議敘。至應徵雜項錢糧。隨同地丁併計分數者。

如有未完。不准給予地丁全完議敘。其不隨同地丁併計分數者。設有未完。給予議處。仍准給予地丁全完議敘。○又題准。署印官任事日久。一年內經徵錢糧全完者。一體議敘。○又題准。直隸州本州。及所屬錢糧。均未全完。經徵督徵兩予處分。若各屬全完。而本州未完。或本州全完。而所屬未完。其經徵督徵。分別議敘。議處。○十年覆准。雲南省徵收地丁錢糧。截至三月底止。所有正雜款項。一官經徵。通完解司者。給予議敘。其三月以後全完。及雜項未完者。不准議

敘○又咨准經徵本年地丁錢糧及隨同地丁
併計分數之雜項錢糧全完應敘各員如有節
年緩帶徵錢糧已經啟徵未完者無論已未限
滿不准議敘○十二年奏准各省寄莊田地由
寄莊州縣將田地畝數科則及戶名錢糧數目
造冊移交業戶住居之州縣代行催繳如有挖
欠將代徵之員及督催之上司按照分數叅處
○咸豐二年奏准上下忙錢糧各省藩司議敘
議處章程擬請上忙完至三分下忙完至五分
者免議其在三分五分以上者分別議敘其不

及三分五分者分別議處。○九年

諭戶部奏各省徵收上下忙錢糧請飭按限造報一摺。國家經費以地丁為大宗。乃各省於上下忙錢糧。竟有因一二州縣未能徵收。遂將全省錢糧數目。概不報部。更有於所屬州縣二叅屆限時。調署離任。巧為規避。延不開叅。以為見好屬員之計。殊屬膽玩。著各督撫嚴飭該藩司。將歷年未經造報者。統限於明年二月以前詳細造冊。送部覈辦。其明歲上下忙錢糧。除雲南貴州二省。向係徵收全完後報部外。其餘各省。著於截止後。上忙限十一月底。下忙限次年五月。

底分析成數報部。儻該州縣依限全完。准其援照成案。量予議敘。如有不肖州縣藉詞延宕。即從嚴叅劾。儻敢瞻徇隱庇。即著該部將該藩司及經徵不力州縣指名嚴叅。以懲玩泄。○同治五年奏准。閩省自被擾以後。田畝荒蕪。徵冊散失。現擬辦就田問賦之法。飭行各屬限定年分。清釐田賦。暫請免計經徵考成。以昭公允。○七年議准。山西歸化和林格爾。托克托城。薩拉齊。豐鎮。甯遠等六廳。每年額徵兵米。並大同朔平二府屬各州縣應徵本色。及改徵米豆。俱限於本年九月開徵。次年

春季埽數全完。另冊題銷。其經徵督催各官。按其完欠分數。均照地丁錢糧之例。分別辦理。又豐鎮廳應徵太僕寺牧廠地畝本色米豆。於次年年底另冊奏銷。其經徵督催各官。按其完欠分數。照江蘇米豆另冊奏報之例。分別初叅。年滿查議。○又議准。山西右衛五旗牧廠餘地。應徵租銀。照地丁錢糧例。按限催徵。另冊題銷。經徵之和林格爾。清水河二通判。督催之歸綏道及巡撫布政司。均照太僕寺牧地本色米豆奏銷之例。按其完欠分數。初叅限滿。分別查議。○

光緒十年咨准呼蘭經徵地畝。照奉天旗租則例。責成八旗佐領承催。協領督催。巴彥蘇蘇地畝。責成同知承催。副都統督催。均自十月開徵起。至次年五月題報全完。照例議敘。未完覈計分數。參處。○十二年奏准山西豐富兩廳經徵民糧折色。並召墾地糧。清水河額徵米折。豐富歸薩和托等廳額徵本色米石。照地丁錢糧例議敘。議處其餘經徵各項地租。照江蘇米豆例處分。光緒九年以後升科各項租銀。亦一律照江蘇米豆例辦理。應開議敘議處職名。以各該

廳為經徵官。歸綏道為督徵官。並將該撫及藩司一併開列。以重考成。

帶徵接徵官考成。○順治十二年覆准。經徵完欠。宜分任事久暫。凡開報經管官職名。必註明到任離任月日。不得前後挪移。○康熙二年題准。凡限內接徵接催之官。均接前任官。總作十分題叅。至巡撫等官。催徵限滿逾期。不將所欠督催分數。及屬官分數題叅者。照原叅分數。加等治罪。○又題准。官員催徵錢糧。於未催完之先。被別案降調離任者。仍罰俸一年。○又題准。

升轉官。如本任有未經銷算錢糧。須扣足分內月日分數。全完後方許前赴新任。若本任內未完。即赴新任者。降職二級。該管官遇屬官有任內未完錢糧。即准赴新任者。降職一級。皆調用。督撫罰俸一年。○五年覆准。帶徵節年錢糧。原限二年全完者。如限內全完。州縣官一萬兩以上。紀錄一次。道府直隸州二萬兩以上。紀錄一次。道府直隸州六萬兩以上。均不俟俸滿即升。布政使司十萬兩以上。紀錄一次。二十萬兩以上。

紀錄二次。三十萬兩以上。不俟俸滿即升。○七年題准。巡撫升任。其原叅督催之案。不必照舊。屬各官每案降級。照離任官例。每案罰俸一年。○九年覆准。限年錢糧。接徵接催。均不必別作分數。止照前官所遺分數內。續完幾分。即予扣算。若本年係一官經管。而年限內有二三官接管者。止於前官未完分數內。按接管月日分算。若本年係二三官經管。而年限內止一官接管者。彙算二三官未完分數內。除續完分數。題叅。○十年覆准。署印官任事日久。一年內經徵錢

糧全完者亦照例議敘。○十四年題准。年限錢糧未完。道府直隸州。同係督催。應與布政使司一例處分。至接徵接催官。半年期限太迫。將接徵州縣衛所。亦限一年。接催司道府直隸州。限一年半。接催巡撫。限二年。如限滿不完。仍照初叅例處分。○十七年題准。署印官一年外徵收錢糧未完。亦照州縣官例處分。○三十四年覆准。凡有分數錢糧。將接徵接催官已完分數扣除。照現在未完分數處分。○四十四年議准。江南蘇松常鎮四府屬賦稅繁重。州縣官本任經

徵每年地丁漕項錢糧。如於奏銷時完至九分
以上。其接徵未完舊欠錢糧。於年限滿後。復叅
降級調用者。改為降級留任。再限一年催徵。如
仍不完。照所降之級調用。其四府督催各官。亦
照此例議處。○雍正四年。覆准江西州縣官。除
本任經徵錢糧。照定例考成外。其接徵未完民
欠。自到任日為始。分別限數。每年令完一限。各
州縣欠五千兩者。分為二限。一萬兩以內者。分
為三限。二萬兩以內者。分為四限。三萬兩以內者。
分為五限。四萬兩以外者。分為六限。六萬兩

以外者。分爲七限。自雍正三年爲始。各照定限。催追。初限不完者。降職一級。至二限內。兩限全完者。開復。如止完二限。不併完初限者。仍帶所降之級。催徵。或止完初限。不完二限者。照初叅例。降職一級。催徵。若初限不完。二限又不完者。照定例。降職三級。調用。以後三限至七限。通計有兩限不完者。皆降職三級。調用。一限不完者。降職一級。戴罪催徵。如接徵之員。除本任無欠外。接徵舊欠。一年內能完兩限者。紀錄一次。完三限者。紀錄二次。完三限以上者。不俟俸滿。卽

升督催之巡撫以下直隸州以上所屬各州縣接徵錢糧合計通作十分巡撫以二分五釐為一限分為四限布政使司知府直隸州以二分為一限分為五限不完者按限議處○十年題准直隸州縣舊欠三千兩者限一年全完三千兩以上至一萬兩以下者分限三年帶徵一萬兩以上至四萬兩者分限五年帶徵分限三年者初限完不足數降職一級戴罪催徵至二限內並將初限全完者開復二限內止完本限不並完初限者仍帶所降之級或催完初限一限

完不足數者。降職一級。皆戴罪催徵。完日開復。如初限不完。二限又完不足數者。照定例降職三級調用。如初限二限皆完。至三限未完不及一分者。降職一級。未完一分以上者。降職二級。皆調用。分作五年限者。亦照此例。○乾隆五十六年議准。地丁錢糧。初叅後。如有接催。接徵官員。俱以到任日為始。接徵州縣衛所官員。限一年。布政使司道府直隸州。限一年有半。巡撫限二年全完。如限內不完。按現在未完分數。照初叅例察議。

欽定大清會典事例卷一百七十四

戶部

田賦 錢糧交代 盤查倉庫

錢糧交代。○順治十三年題准。官員交代。務清查錢糧。交盤明白。取具甘結。方准離任。違者。不論升任去任。題叅追究。○十四年覆准。前官交盤不清。後官蒙混聽其去任。即令接任官與原任官同賠。○十五年題准。前任官未完錢糧。果係民欠。令接管官催徵。不得推諉。若前任官侵盜。後任官不能清查。互相蒙蔽者。一併治罪。○

十七年覆准。府佐貳官署州縣印。侵用錢糧。勒令屬官交代。上司徇庇不舉者。一併治罪。○康熙六年覆准。州縣衛所錢糧。以欠作完。督撫司道府扶同捏報。許接管官逐項清查。如起解無批。存留無銀。交代時。即具文直達部科題叅。○十二年覆准。前任官有侵挪拖欠者。署印新任官交代時。即通報督撫上司題叅。如徇隱不報。交代後查出者。罪坐接管官。如已通報。而上司不詳報題叅。徇庇舊官。逼勒受代者。許新任官據實報部。逼勒之上司。以徇庇例議處。本官赴

部別補。○十四年題准。布政使司新舊交代務於一月內。造舊管新收。開除實在清冊題報。○二十七年題准。司庫交代錢糧。如有侵盜虧空等弊。督撫隱匿不叅者。革職。如督撫有侵欺入己者。照監守自盜例治罪。○又議准。州縣虧空。知府不行揭報。反逼新任官出結者。革職。○二十八年題准。廣東瓊州府距省遼遠。交代之限。於兩月定例外。再展限一月。○三十年覆准。司庫交代錢糧時。令該督撫親查出結。如總督隔省。路途遙遠。於司庫交代錢糧時。據詳確查明。

白。出結具題。○三十九年覆准。升任官文憑到日。該督撫即委官署印。限兩月內。將事件交代明白。方准離任。如任內有經管未完錢糧。不於兩月內交清。呈報上司。及署官新官推諉不接者。各罰俸一年。上司督催不力。罰俸六月。如已申報上司。該管上司不即轉報。或該管上司已經轉報。督撫具題遲延。皆罰俸六月。不即委官署印者。罰如之。如並無未完錢糧。而署官新官藉端抑勒遲延者。降職二級調用。該管上司抑勒者。如之。督撫降職一級留任。至升任後續起

事件。及未完錢糧。署印官不於兩月內揭報。該撫題參。本官每案罰俸一年。其任內有侵盜透冒。挪移墊解。並拖欠未清等弊。署官新官揭報。該撫題參。將本官照例處治。如署官新官徇隱不報。交代後始揭報者。該撫覈實題參。將虧空官革職治罪。接任官照徇隱虧空例議處。虧項照例追賠。若接官不受交代。通詳上司。上司不揭報題參者。照徇庇例議處。○又覆准。升任官有錢糧冊籍等項未完。詭稱完結。或假捏印結。中詳上司。或增改投遞者。革職。儻本官冊籍等

件。未交代以前。被衙役藏匿及燒毀擲水者。降職一級調用。如任衙役乘機作弊。侵匿帑項者。照失察衙役侵盜錢糧例處分。○又覆准。解任裁汰降調官。不候交代。擅自離任。及該管上司督撫聽其離任者。皆照升員離任例處分。○又覆准。司道府州縣新舊官交代之時。如前官任內有侵盜透冒。挪移墊解及拖欠未清等弊。署官新官徇隱不即揭報。至交代後始查出者。罪坐接任官。前任官不議。侵盜透冒者。照侵盜例治罪。挪移墊解者。照挪移例處分。○又覆准。升

任官不候文憑。不與署官。新官交代明白。即擅離任者。本官降職二級調用。若有錢糧等件未清。該管上司聽其赴任者。降職一級調用。督撫罰俸一年。○四十二年奏准。各省藩庫交代。定限兩月。○雍正二年議准。直省司道府廳州縣新舊交代。照例於兩月內盤查明白。出具印結詳報。如有督撫逼勒交盤者。許新任官揭報到部。由部題參。交與都察院審明議處。○四年議准。嗣後州縣交代。除實在民欠外。其有將已徵在官之錢糧侵蝕虧空。捏稱民欠。令接任官接

受者。接任官即揭報督撫司道。該督撫即據揭題參。或督撫司道護庇離任之員。該管知府知州。畏慮分賠。因而抑勒交盤者。被抑勒之員直揭部科。部科代為陳奏。如揭司道府州等官。令各該督撫據實確審。定擬具奏。有干連督撫者。將具揭之員。與前任虧空之員。均押解赴京。交都察院查審明確。將抑勒之督撫。一併治罪。或係誣捏。將誣捏之員。交刑部加倍治罪。儻前任官虧空。後任官徇隱不報。出結接受者。坐後任官賠補。或已經接受。至本身離任之時。有虧空

未清。稱係前任虧空者。將欠項追賠外。仍治以徇隱私受之罪。其出揭之員。經調任他省。該管上司有因該員從前揭報之故。多方按求。藉端誣陷者。許該員於都察院呈辯。果係叅處冤抑。將該上司議處。如該員本有應得之罪。藉從前揭報之名。誣捏呈辯者。於本罪之外。加倍治罪。○又議准。糧道交盤錢糧。照布政使司交盤之例。造具細數四柱冊。具題交部。將動撥各款覈對。○又覆准。知府直隸州知州離任時。本任內倉庫錢糧。仍照定例限兩月交代。其所轄州縣

一切正雜錢糧。再限一月造冊交代。令署官盤查出結。如署官查出虧空揭報。即著前任府州均半分賠。署官亦與新任官造冊交代。如逾限不即交代。及該管官督催不力者。一併議處。○五年

諭。凡屬新舊官交代遲延。大約由於舊官案件不清者多。而由於新官勒索者少。若新舊一例處分。未為允協。著九卿分別定議具奏。欽此。遵

旨議定。凡督撫數奉交代遲延。即將情由詳細確查。如果係舊任官希圖掩飾。不於兩月內將任內錢

糧等項。徹底清白。造冊交送新任官。則遲延之咎。專在舊任官。與新任官無涉。該督撫即將舊任官因何遲延緣由。明白開註指叅。將舊任官照例罰俸一年。新任官免議。如舊任官已徹底造冊送交。而新任官推諉不接。以致遲延者。該督撫即將情由註明指叅。將新任官照例罰俸一年。舊任官免議。如舊任官至限期將屆。始將冊籍造送。新任官又不即上緊查覈。以致遲延。則其咎固在舊任官。而新任官亦難辭責。該督撫將此情由。亦行分別註明指叅。將舊任官罰

俸一年。新任官罰俸六月。其督催不力之上司。仍照定例議處。○又議准。嗣後各省州縣。凡一應經管事件。仍照舊例兩月交代報部。惟積儲倉糧。必逐一盤查。嗣後倉糧多至五萬石以上者。報明上司。准於定限兩月之外。展限一月。○六年。

諭。向來州縣交盤錢糧倉穀。均以兩月為限。但額徵數少之地方。自可依限清楚。其額數繁多之處。亦照兩月定限。未免太迫。從前曾降諭旨。凡州縣倉穀五萬石以上者。准其展限一月。盤查交代。嗣後州縣錢糧

交代五萬兩以上者。亦令展限一月。其十萬兩以上者。展限兩月。十五萬兩以上者。展限三月。著為定例。通行直省遵行。○又覆准。州縣官交代時。應交銀米。如有贏餘。據實報出。照贏餘錢糧作數。或花戶完納偶錯。或官役俸工養廉。工程物價。前官未及支銷者。當確數給還。不得概作贏餘混報。○八年覆准。嗣後倉糧二萬五千石以上者。展限十五日。一人有兩縣交代者。再展限一月。○乾隆元年議准。委署之官。如果易於交盤。而故意延挨。希圖卸責者。該監盤上司查明揭參。降職。

二級調用。監盤上司徇隱不揭叅者。降一級調用。○二年題准修理。

文廟學宮。例於學租銀內動用報銷。新舊交代之際。或有殘缺損壞。應行修整之處。查明學租多寡。工程大小。照例聲明交代。其祭器樂器。原有者造冊交代。未備者陸續接辦。○又題准。州縣忠義節孝祠宇。令前任官修整交代。後任官接受修葺。如有動帑建立。未久坍塌者。原辦之官賠補。又

先農壇及農具。

雲雨。風。雷。社稷。山川。城隍。諸神壇墀。及營房墩臺。柵欄。火具。水銃等項。已經修備者。照例交盤。未完備者。照案接辦。又古昔

帝王陵寢。先賢祠宇。社學。青海碑。及建牕。濬河等事。前任官料理未竣。各交明接任官。照例接辦。不得推諉。○又議准。江蘇。清河。桃源。宿遷。三處。新修橋梁道路。令地方官。新舊交代之時。照例造入交盤冊。以專責成。○又題准。存櫃存庫。號箱。並存倉廩口各冊。新官到任。前官止造簡明總冊。三日內移交。其應行交代之堂簿串根冊籍。

批領卷宗四柱冊。及一應自理詞訟文冊。限半月內移交。如有舛錯。案據未全。新官向經承追比。一月內。新官務將應交冊卷。追齊查覈。○又題准。承追錢糧虧空侵挪。贓罰贖鍰代賠分賠等項。先將存庫銀錢存倉租息米穀收清。次查交存官物田房。有無抵換盜賣倒塌荒廢私占私侵。及分賠案內倉穀官物。有無微變短少。未變價值。是否數足。未完銀米。是否有著。確覈原案。遵照定限。清查冊報。○又題准。未完民欠。有無官役侵蝕捏報之處。如徵比時。有以已完控

告者立即根查訊處。○又題准承修承造承辦事務動用錢糧咨題報部續奉覈減駁追者均應本案完結如係未經報部奉上司駁追者應於交代限內有則補交歸款無則請參虧空。○又題准州縣新舊交代該管知府不得輾轉苛求以致不能依限清楚如有此等經州縣通詳止叅知府遲延職名但不得於正限滿日藉詞諉卸其有應駁詰事件照例駁行覈轉因而遲延逾限者咎在造冊舛錯之州縣其知府督催不力照例議處。○又題准交代之際原恐新官

被前官胥役欺蔽。是以定例委官協盤。使新舊
允服交代速結。儻委官耽誤不到。以致遲延。或
已到而有通同徇隱偏袒苛累等情。皆分別揭
參。○三年題准。廣西煙瘴俸滿。於報滿之時。督
撫將各官居官實蹟。出具考語。分別題咨。仍委
員前往交代。撤回內地候升。○二十三年覆准。
布政使升任本省巡撫。其任內經手錢糧。令總
督確查具題。如無總督省分。即著護理布政使。
將前司任內經手錢糧盤查。出結題報。○二十
四年議准。江蘇州縣交代。有積欠錢糧數在五

萬兩以上者。於原限外展限兩月。五萬兩以下者。展限一月。清查結報。○二十六年奏准。織造經手錢糧絲斤。及徵存關稅。新舊交代。照地方官兩月交代之例。責成接任官查明。造具冊結。咨部查覈。○二十七年議准。嗣後各省州縣交代。於原定兩月限內。舊任造冊。分限二十日。新任查覈轉造。分限四十日。其例得展限者。均照應展月日分算。○二十八年議准。嗣後藩司暫行離任交代。如署任官在兩月以上者。仍令該督撫將署任內經手錢糧。分案具題。如署任不

及兩月者。即併入正任官回任交代案內彙題。其各省糧驛鹽道正署交代。亦照此辦理。○三十年議准。嗣後署任藩司。雖係督撫暫行檄委。亦將接受交代清楚緣由。自行陳奏。○三十一年議准。州縣庫存錢糧交代。彈兌至易。若照現行定例。展至三月之多。或致潛滋弊竇。嗣後在庫錢糧交代。凡在五萬兩以上者。於正限兩月之外。展限半月。十萬兩以上者。展限一月。十五萬以上者。展限四十五日。○三十六年議准。嗣後升調藩臬各員。俱照即速赴任之例。凡一切

交代。定限兩月者。改為一月。道府亦係大員。交代限期。亦應照例。按限減半。○又議准。藩庫為通省錢糧總匯。款目繁多。收支冗雜。交代改為一月。恐限期太促。嗣後布政使遇有遷調。仍照舊例。統限兩月。新舊交代接收。各分限一月。其鹽運司新舊各官。亦照藩司之例辦理。○三十七年奏准。州縣官倉庫錢糧。交代之外。遇有經手軍需。及新疆經費錢糧。即照供支事竣造冊齎司之限。責令清查結報。如供應口外往返官兵車輛等項事件。原定兩月造冊齎司者。其交

代亦於錢糧正展各限之外。寬限兩月。採辦調
取等項事件。原限四月造冊齎司者。其交代亦
於錢糧正展各限之外。寬限四月。遲逾指叅。如
辦理軍需。支發繁多。有不能如期結報。必須再
為展限者。該督撫臨時將實在情形查明具奏。
覈復辦理。○四十年奏准。各省督撫標協營員。
經管兵馬錢糧。其交代時。應按照營制大小情
形。分別定限。陝甘雲貴等省。地處邊徼。督撫提
鎮等標。事務較繁。定限四十日。及五十日。其餘
各標協營。與江蘇等十四省。均定限一月。造具

冊結咨部。如有遲逾。該督撫詳註開參。照文職交代之例。分別議處。其暫任不及三月者。統歸後任接收交代。併案聲明結報。○四十三年議准。直隸按察使庫存驛站錢糧。遇有交代。造具冊結。會同藩司查覈。詳請題報。○四十八年議准。州縣離任。委員署理。其原委之員。遇有事故。應行離任者。始准另行改委。仍將改委起限緣由。聲明報部。如原委之員。正在交代限內。並無應行離任事故。而督撫執行託故改委。希圖展限者。一經查出。將改委之各上司。俱照徇庇創

議處。○又議准。閩省歸官辦運鹽課之長樂。福清。晉江。惠安。同安。龍巖。南安。永安。莆田。龍溪。漳浦。南靖。長泰。平和。詔安。海澄。霞浦。甯德等十八州縣經手鹽課。凡遇新舊交代。照地丁一體立限兩月。交收清楚。造具冊結咨部。僅有虧缺。遲延。將該州縣及該管之道府。照例分別叅處。○五十年議准。各省督撫咨報州縣交代。將監盤委員職名。一體送部。如有交代錢糧數本不足。而監盤之員意存偏袒。勒令接收者。據實叅奏。將監盤官依監守自盜律治罪。如藩司不將監

盤職名一併申送。照徇底例議處。○五十四年奏准。川省新疆各屯員及總理同知。新舊交代。照內地州縣之例。定限兩月。交收清楚。依限結報。如有遲逾。照例分別議處。○嘉慶四年

諭。錢糧交代有無虧缺。均於限內結報。定限綦嚴。若聽其私立議單。設法通融。將前任虧缺之銀。又復帶至新任。措銀賠補。是舊任之虧欠甫完。而新任之虧欠又增。成何事體。嗣後各督撫於所屬地方交代一節。如於限內未能交清。應令接任官逐款查明。揭報上司。將該員截留在省。務須交代清楚。方准赴任回籍。

不得通同寫立議單。希於限外通融彌補。致干例禁。儻仍前積弊。一經發覺。除監交出結之員著落賠補外。並一體治罪。仍將各該上司分別嚴議。○道光元年

諭直省各州縣虧空倉庫。全在該督撫隨時查察。而杜虧之法。總以嚴查交代為清釐倉庫之關鍵。嗣後凡遇州縣交代。無論升調及告病人員。各令依限揭報。據實辦理。其業經報明彌補列入清查之州縣。如正展限內結算未清。該督撫奏明先行完結。本員交代。歷任欠交錢糧。著即酌定限期。另案完結。若未經報

明彌補列入清查者。不得援以為例。至該州縣私立虧短約議。著即嚴行禁止。儻結報無虧後。復有呈出約議。以諉前任舊虧者。除不准作據外。新舊官及監盤官。一併治罪。該督撫務當覈實稽查。遇一案即辦一案。庶足以杜挪新掩舊之弊。○咸豐二年

諭山西清查章程。既經兩次釐定。由部議准。一切應追應解各款。著即由該撫分別報部查覈。其彌補舊虧。有酌提優缺羨餘一節。恐啟挪新掩舊之弊。嗣後州縣交代。該撫務當嚴飭該司。截清款項。禁止通融。斷不准以前任無著之款。累及後任。儻該管上司抑勒。

接受。及虛出通關。希圖掩飾。即著一併叅處。○同治

四年

諭。戶部奏請飭直隸等省清釐交代一摺。直隸省州縣交代各案。前經譚廷襄酌定章程。分別新案舊案。立限清釐。乃時逾多年。並未依限結報。各該州縣視為具文。任意積壓。該管上司又復置而不問。玩泄因循。實屬不成事體。著照該部所請。所有直隸省各州縣交代。著仿照山東新章辦理。將同治四年以前未結各案。作為舊案。無論任數多寡。統限三箇月。將未完銀穀。按員造冊。逐案報部。同治四年以後。即屬新案。

應依例限結報。二、奏逾限。即將該州縣奏參革職懲辦。該管上司延不續報。由戶部奏參照例議處。其新舊各案分別已未完結。定限半年彙奏一次。如有應行扣展者。隨時奏請。儘屆限不奏。即將該總督藩司交部議處。至結報章程。無論正署各員。總須各任分報。不准累任統報。以杜牽混。並不得以駁改冊籍扣算時日。巧脫處分。一、有虧款。立時追繳。亦不得以清出抵款批解為辭。巧飾虧挪。其軍需墊款。總以覈准報部者為憑。不准籠統列抵。蠲緩錢糧。以奏銷到部者為斷。不准混作民欠。如此明定章程。嚴行考覈。庶

錮習可除。藉資整頓。其順天府屬熱河承德府屬交代。著一律照辦。即由戶部將交代未結各州縣。開單分別知照該總督府尹都統等遵照辦理。直隸為畿輔近地。積弊尚復如此。外省難保無此等情弊。並著各該省督撫體察情形。參酌山東新章。一體認真查辦。毋任不肖州縣。暗虧國帑。以肅吏治而裕餉源。○

光緒六年奏准。州縣交代未清者。實缺人員。不准到任。調署候補人員。不准委署他缺。並不准另派各項差使。如交代案內有兩任虧短。即係前任未清再行調署委署之弊。該省督撫藩司。

照徇成例議處。並將虧短著落分賠。○十年奏准。各直省州縣交代。自十一年正月起。無論州縣選補升調委署。該藩司均將其到任日期。咨報戶部。並由吏部將各省州縣升調委署。於每月月終知照戶部。以便互相稽考。仍由戶部隨時按限扣算。如已逾二叅日久。未據將交代冊結送部。亦未據以二叅遲逾查叅者。即由戶部徑行奏叅。將該州縣照二叅逾限例革職。藩司照徇隱降三級調用私罪例議處。冊結送部者。戶部亦按限扣算。如已逾二叅日久。戶部覈其

遲延月日。扣去初次往返程途。逾限在三箇月以外者。併行參奏。將該州縣仍照二叅逾限例革職。藩司照徇隱例議處。○十一年議准。各省州縣交代。虧短銀數在六千兩以上者。限一年半。一萬兩以上者。限二年。一萬五千兩以上者。限二年半。追繳均暫行革職。全完開復。逾限不完。及完不足數者。現任候補丁降告病人員。革職監追。查抄備抵。已革已故人員。一律照例參辦。自本年三月二十六日行文之日起。限五日。作為到省起限日期。一體遵辦。○十三年奏准。

各省州縣交代冊結到部。凡逾限在三箇月以外者。仍查照定例。數明州縣造報月日有無違逾二叅限期。如該州縣已逾二叅限期。該管司道府州。並不揭叅。即將該州縣仍照二叅逾限例。革職。該管道府直隸州暨藩司。均照徇隱例議處。如州縣造冊出結在二叅限內。道府直隸州。造冊出結在二叅限內。道府直隸州。加結程途數轉各例限亦未逾違。而藩司詳院督撫出咨。無故逾限在三箇月以外者。無論督撫藩司。何處遲延。即由戶部徑將該督撫藩司。一併奏

叅交吏部查取職名。照遲延例議處。

盤查倉庫。○康熙二十八年題准。嗣後各省巡撫。於每年奏銷時。親往藩庫盤查錢糧。如無虧空。即於奏本內保題。保題之後。仍有查出虧空者。照二十七年題准新定交盤例治罪。又於歲終。令知府將州縣經徵帶徵錢糧。調取比冊詳查。儻有徵多報少。虧空情弊。申報藩司巡撫。如知府徇匿不舉。亦照新定交盤例議處。○又題准。糧驛二道存庫錢糧。責成藩司。各府存庫錢糧。責成各道。令每年歲終親往盤查。如無虧空。

即具保結申送巡撫。僕保結之後。仍有查出虧空者。該撫題參。將藩司各道皆照例革職分賠。○三十九年題准。上司盤查所屬倉庫。例於年終時限甚迫。准自次年奏銷以前。秉公親查。據實出結。○又題准。歲終知府盤查州縣錢糧。除例應存留外。其餘於三日內起解藩庫。如三日內不起解。即揭報題參。○四十四年覆准。知府年終盤查出結之後。仍令不時盤查。無論何時查出。立即報參。免其治罪分賠。或別案發覺。始行揭報者。仍照例治罪分賠。如有知府需索州

縣者。亦許州縣通報司道督撫題參治罪。如督撫不具題。或被科道糾參。將督撫照徇庇例處分。○雍正元年議准。嗣後藩庫錢糧。每年奏銷時。該省有總督者。令該督會同巡撫親查。無總督者。責成巡撫盤查。錢糧無缺。出具印結。於奏銷本內保題。如有虧空。該督撫題參。如扶同徇隱。一併治罪。照例分賠。如督撫抑勒下屬挪借濫動。以致虧空者。該布政使司即照新舊官交代不明之例。通詳各部院。或具揭密送各部院據揭奏。

聞將督撫議處。○又覆准。知府盤查倉庫。凡一應禮物。永行禁止。○又

諭。總督有管轄兩三省之責。或隔二三年。或隔三四年。於題明巡查地方之便。會同盤查藩庫。○乾隆二十四年。奏准。西藏糧員所管餉銀。令駐藏大臣。每年盤查一次。造冊咨送總督查覈。○二十六年。議准。糧驛二道庫。存錢糧。每年奏銷時。令同城督撫盤查。但藩司為通省總匯。其道庫每歲支存數目。有無虧挪。責令藩司覈明。於督撫盤查之先。具結詳送。盤查之後。如有虧空等弊。仍照

例分別議處。○又奏准。嗣後凡遇督撫接任。應行盤查藩庫之時。糧驛二道。如係駐紮同城者。該督撫一體親往盤查。有無挪移虧缺。一併附摺具奏。○二十七年議准。各省道庫。遇有新舊交代。亦令督撫親驗盤查。所有收支實存數目。仍著藩司覈明加結詳送。督撫保題。儻結保之後。有虧挪等弊。照例分別議處。○三十一年議准。州縣倉庫錢糧。該管知府直隸州。遵例親盤。不得轉委互查取結了事。亦不得豫示日期。縱令掩飾。如有前弊。經督撫訪聞。司道揭報。即密

委幹員馳往親查。如州縣錢糧並不虧缺。將不親詣盤查。及豫示日期之該管府州各員題叅。照不應重公罪律。降二級留任。如查出州縣虧空確數。即將該管府州。照通同徇隱例。一併題叅革職。不得以同時揭報。寬其併叅。亦不得僅以盤查不實。不得揭報。從輕議以降級留任。○
三十二年奉

旨。傳諭各督撫。於年終將屬員有無虧空之處。彙奏一次。以重責成。著為令。○又議准。烏魯木齊提督巴里坤總兵庫內分儲銀兩。嗣後凡遇新舊接任。覈

實題報。其平日統歸提督不時查察。陝甘總督遇巡查提鎮營伍時。一體確覈稽查。○四十二年議准。山西巡撫兼管鹽政。凡遇運使交代。及奏銷之時。先委道員代盤結報。每年不拘何時。親赴運城運庫盤驗一二次。不得全委道員。以慎庫項。○四十七年奉

旨。各省遇有臬司委署藩篆者。其交代驛站錢糧。統俟新任藩司到任後。再行詳細盤查。出結申送督撫查覈。以專責成。毋庸另委道員。著為令。○又議准。各州縣將倉庫實存數目。每三月彙報一次。申送該

管道府查覈。加結彙送藩司。轉申督撫。該管督撫隨時抽查。一經查出虧短。立即叅革治罪。○又議准。烏魯木齊鎮迪道屬各府州縣。每年年底盤查。照依內地州縣倉庫錢糧。截至該年十月底止。由本管道府親往盤查。加具切實印結。於十一月內。呈請都統咨送戶部會辦。○又奏准。鎮迪道屬之鎮西府迪化州。並所管各廳縣縣丞。一切領存動支銀兩。飭令按季開造四柱清冊。責成鎮迪道確查彙冊加結。呈送陝甘總督查覈。每年不拘何時。密委內地道府攜帶冊

籍前往抽查。即令委查之員具結申報。僅有虧
挪。嚴參治罪。○五十四年奏准。川省新疆地方
各屯員及總理同知。均有經管倉糧庫項。自應
查照內地州縣之例。凡遇交代。屯員則由同知
委員監盤。同知則由松茂道委員監盤。出結通
報。由藩司覈明咨部。如有虧短。照例分別議處。
○嘉慶七年覆准。各直省州縣正署經手交代。
責成該管道府等官悉心盤查。僅有虧短。即行
據實參辦。毋得通融翫忽。如出結之後。或有虧
短等情。別經發覺。將出結之員嚴行參處。凡分

駐地方。經管錢糧之同知。通判。縣丞。及營衛等官交代。均照州縣例辦理。○二十四年

諭令各省藩庫。於實收實支簿冊外。添設各州縣支解冊。○道光四年奏准。直省藩司衙門。每月開庫日期。將收過每州縣何款銀兩若干。收入何款項下。並支放銀兩。係在某款存銀若干內動支。逐一開造細冊。次日詳報督撫稽覈。如有蒙混。立即查究。督撫內有兼管鹽政者。鹽道庫收放鹽課銀兩。亦一律辦理。○光緒十年奏准。各州縣倉庫錢糧。概令遵照定例。按三箇月中報一次。並

令各州縣上下忙徵完錢糧時將本屆實徵若干造冊申送各上司。凡應解之款限一月之內儘數解司。不准絲毫存留屬庫。每上下忙徵完後一月內該管道親赴直隸州府。府州親赴各屬縣。即將各屬庫數對盤驗確。查收解的數。出具甘結。由藩司加結。上忙限於當年十一月下忙限於次年五月。送部查覈。每屆年終各督撫開單具奏。先將具結之道府州並所屬州縣職名開單咨部。如先已結報並無徵存未解及結報無虧。嗣經查出虧欠者。即照例先將具結之

道府州革職離任。無論本員現任。已革病故。亦不論虧員為侵為挪。均照例將本員叅革勒追。限滿無完。即著落具結。之道府州獨賠。不得以失察在先。同時揭報。議以降留分賠之例。